

Protocol da la radunanza cumünala dals 29 mai 2007

Preschaints: 23 personas

Sco dombravuschs vegnan elets Julia Rodigari e Paul Schucany.

Il protocol da la radunanza cumünala dals 28 november 2006 vain approvà.

renda quint 2006

Quint da gestiun

Il quint dal 2006 serra pro entradas da fr. 4'675'968.28 e sortidas da fr. 4'776'310.23 cun ün s-chavd da fr. 100'341.95. I d'eira büdschetà ün guadogn da fr. 34'110.--. In quist resultat sun eir integradas las amortisaziuns totalas da fr. 595'600.--. L'inspectorat da cumüns ha racumandà al cumün da corregger differentas aczias e da tillas valütar nouv cun ün franc. Quista correctura ha influenzà il quint per l'import da fr. 229'482.--. I's po garanti dir cha quai saja il motiv pel s-chavd.

Quint d'investiziuns

Las investiziuns bruttas importan fr. 1'330'565.55. I sun entradas subvenziuns e taxas d'attach per fr. 739'587.10, tant cha las investiziuns nettas s'amuntan a fr. 590'978.45. Il cash-flow importa fr. 693'043.75, quai vuol dir chi'd ha dat ün vanz da finanziaziun da fr. 102'065.30.

La prüma etappa da la via da Muglinèr ha cuostü da fr. 384'899.20. La radunanza cumünala dals 11 avrigl 2006 ha approvà il credit. Il proget per l'introducziun dal tempo 30 es gnü fat a fin (fr. 27'013.35). In tuot ha quel cuostü fr. 42'554.60.

Pro'l provedimaint d'aua esa gnü investi fr. 27'893.85 per far masüraziuns dals reservuars da Ftan Pitschen e da Ftan Grond.

Las lavuors dal proget da Plütschessa sun gnüdas cuntiuadas (fr. 613'050.75). Per pudair far las lavuors preparatoricas per drivir la seguond'etappa da Fionas e per digitalisar las datas haja fat dabsögn d'investir ün import da fr. 29'651.60. Quist import nu d'eira büdschetà.

Pel proget dal condot d'energia Nauas - Nuis-chel esa gnü investi fr. 47'639.05. Las lavuors nu sun amo fattas a fin e vegnan cuntinuadas.

Las lavuors vi da la parcella in Plaz han chaschunà cuosts da fr. 37'751.35 e surpassan il preventiv (fr. 30'000.--). Las lavuors vi da la Posta Veglia sun stattas plü cumplichadas co previs. I d'eira büdschetà ün import da fr. 35'000.--. Il Cussagl ha deliberà amo ün credit supplementar da fr. 20'000.--. In tuot ha cuostü l'investiziun fr. 54'606.95. Las lavuors sun gratiadas bain. Ftan Turissem e bliers giasts sun satisfats dal büro d'infuormaziun nouv.

Bilantsch

La radunanza cumünala dals 28 november 2006 ha decis da cumprar la parcella nr. 2679 in Sainas chi appartgnaiva a la BD immobiglias SA. L'intenziun dal Cussagl es quella da metter a disposiziun il terrain sco piazzal per fabbricar üna chasa cun plüssas abitaziuns a cundiziuns favuraivlas. La cumprita da la parcella ha cuostü fr. 246'000.--.

Ils debits a mezza ed a lunga vista s'han augmentats per fr. 227'780.-- ed importan a la fin da l'on fr. 5'842'500.--.

Causa il s-chavd da fr. 100'341.95 s'ha diminui il chapital agen sün fr. 704'470.76.

Siond cha'ls fits ipotecars sun pel mumaint fich favuraivels es l'incharg dals fits relativ bass cun 1.64 %. Il Cussagl s'es consciaint cha'l debit saja ot cun fr. 5'800.-- per abitant e chi saja da provar a til redüer. In vista a las grondas investiziuns chi'ns spettan i'ls prossems ons sarà quist però ün böt pac realistic. Il cumün varà d'investir i'l provedimaint d'aua, i'ls repars cunter lavinas ed illas vias cumünalas.

Causa ün sbagl da stampa pro l'extrat dal rendaint nu's cunfan las cifras dal bilantsch pro la culuonna „augmait“ cul rendaint detaglià. Las cifras pels 31 december sun però güstas.

La radunanza approvescha il rendaint (quint da gestiun e d'investiziun) pel 2006 e'l bilantsch pels 31 december 2006 e da dis-charg als organs respunsabels.

sarinera e provedimaint d'aua, collavuraziun cun Scuol

L'idea d'üna collavuraziun culla sarinera e cul provedimaint d'aua cun Scuol s'ha datta cur cha'l cumün ha tscherchè soluziuns pel piket. La collavuraziun dess esser simpla e pragmatica. La coordinaziun da las gestiuns suottastà al manader dals uffizis technics da Scuol. L'impiegà Linard Josty es ingaschè be plü per la sarinera e'l provedimaint dals duos cumüns. Il temp da prova da la collavuraziun ha cumanzà als 1. marz e'ls resultats sun positivs. Il Cussagl es persvas cha la piazza dvainta uschea plü attractiva e chi's possa dovrar tschertas sinergias. Perquai propuona'l a la radunanza da far bun quista collavuraziun.

Sainza ingünas cuntravuschs fa bun la radunanza la collavuraziun cul cumün da Scuol per quai chi riguarda la sarinera e'l provedimaint d'aua.

uorden da sunteri, revisiun parziala

Be avant bundant ün on es gnü revis il uorden da sunteri. In seguit s'haja constattà chi nu saja prudaint scha la radunanza haja da fixar ils lös per las urnas. Perquai propuona il Cussagl a la radunanza da müdar l'artichel 11 da möd cha'l Cussagl possa fixar il lö per las urnas. Ün votant voul savair ingio cha'l Cussagl haja lura pensà da metter las urnas.

Il capo declera chi saja previs da fixar il lö suot la baselgia per las urnas. Ad üna votanta nu para quai il lö ideal. La cusgliera respunsabla pel sunteri dess ir sül lö culla votanta e guardar schi dess eir oters lös per las fossas da las urnas.

Sainza ingünas cuntravuschs approvescha la radunanza la revisiun parziala dal uorden da sunteri.

varia

Ün votant giavüscha al Cussagl da stübgjar la pussibilità da stüder las glüms da via davo l'üna. Il Cussagl piglia incunter quista proposta.

il capo: sig. Reto Pedotti

l'actuar: sig. Andri Florineth